

दिनांक 19.12.2024

समय: 18.45 बजे

आकाशवाणी जयपुर-अजमेर

प्रादेशिक समाचार

- मुख्यमंत्री भजनलाल शर्मा कह्यो—कांग्रेस कदे ई बाबा साहेब डॉ. भीमराव आम्बेडकर रो मान नी कीनो।
- जल शक्ति मंत्रालय राज्यां ने गांवाई हलकां मांय पाणी रा कनेक्शन मुहैया करावण रा काम मांय तेजी लावण बाबत् कह्यो।
- प्रदेश मांय आज सुशासन सप्ताह रा तैत प्रशासन गांवों की ओर अभियान री जनसुणवाई सागे सरूआत व्ही।
- मौसम विभाग आवता दो सप्ताह सारू पूर्वानुमान जारी कीनो—25 दिसम्बर ऊं प्रदेश रा न्यारा—न्यारा हलकां मांय बिरखा रा आसार।

000

मुख्यमंत्री भजनलाल शर्मा आज दिल्ली मांय कह्यो के भारतीय जनता पार्टी बाबासाहेब भीमराव आम्बेडकर री अंत्योदय री सोच माथे चाले है। वे कांग्रेस माथे बाबासाहेब रो मान नी करण रो आरोप मांड्यो। मुख्यमंत्री कह्यो के भाजपा दलित पिरवारां ऊं ताल्लुक राखण वाळा रामनाथ कोविंद अर आदिवासी समाज ऊं आवण वाळी द्रौपदी मुर्मू ने देश रा राष्ट्रपति बणबा मांय मदद कीनी। दूजी कानी कांग्रेस रा प्रदेश अध्यक्ष गोविंद सिंह डोटासरा आज जयपुर मांय खबरनवीसां सागे बातचीत करता थकां कह्यो के संसद रा कामकाज मांय अड़चन डालणो, बाबा साहेब रो अपमान करणो अर जनता रा नुमाइंदां सागे अशोभनीय बर्ताव करणो भाजपा रा अलोकतांत्रिक रवैया ने बतावे है।

000

जल शक्ति मंत्री सी आर पाटिल कह्यो है के वां राज्यां सागे मिल र काम कर रही है, जठे गांवाई हलकां रा हर घर ताई नळ रा कनेक्शन मुहैया नी कराया जा सक्या है। वे आज नई दिल्ली मांय खबरनवीसां सागे बातचीत करता थकां कह्यो के हाल ई चार करोड़ घरां मांय नळ रे जरिये पाणी नी पूगायो जा सक्यो है।

000

जयपुर मांय प्रदेश भाजपा रा दफ़तर मांय खास प्रेस वार्ता राख्यी ज्यी। इण मांय उपमुख्यमंत्री डॉ. प्रेमचंद बैरवा, मंत्री सुमित गोदारा अर भाजपा रा आला नेता राजेंद्र राठौड़ खबरनवीसां सागे बातचीत कीनी। उपमुख्यमंत्री डॉ. बैरवा लारला दिनां जयपुर मांय व्ही **‘राइजिंग राजस्थान ग्लोबल इन्वेस्टमेंट समिट’** रा तैत करी ज्या न्यारा-न्यारा करार रो जिकर करता थकां कह्यो के आं ऊं नौजवानां ने नौकरी धंधा रा और मौका मिलेला।

प्रेस वार्ता मांय मंत्री सुमित गोदारा कह्यो के प्रधानमंत्री नरेंद्र मोदी री मौजूदगी मांय जयपुर मांय व्ही जनसभा मांय मोटी तादाद मांय जनता शिरकत कीनी। पार्टी रा आला नेता राजेंद्र राठौड़ कह्यो के राज्य सरकार 80 हजार नौकरियां देवण सारू कैलेंडर जारी कीनो है।

वे ईआरसीपी री चर्चा करता थकां कह्यो के ई योजना रो 90 फीसदी खर्च केंद्र सरकार करेला।

000

राज्य निर्वाचन आयोग प्रदेश रा 9 ज़िलां मांय स्थानीय निकायां रा रीता ओहदां माथे उप-चुनाव रो कार्यक्रम जारी कर दीनो है। आयोग रे मुजब सदस्य ओहदा सारू 9 जनवरी, 2025 ने वोट पड़ेला। ई सारू 26 दिसम्बर ने अधिसूचना जारी करी जावेला। नामपाना 28 अर 29 दिसम्बर ने छोड़ र 30 दिसम्बर ताई संवारे साढे दस ऊं दोपहरां पाछे तीन बज्यां ताई दाखिल कर्या जा सकेला। 31 दिसम्बर ने पर्चा री जांच करी जावेला अर 2 जनवरी, 2025 ताई नाम पाछा लिया जा सकेला। वोटों री गिणती 10 जनवरी ने करी जावेला। अध्यक्ष ओहदा सारू 20 जनवरी, 2025 ने वोट पड़ेला। ई सारू 13 जनवरी, 2025 ने अधिसूचना जारी करी जावेला। 14 जनवरी ताई पर्चा दाखिल कर्या जा सकेला, ज्यां री जांच 15 जनवरी ने करी जावेला, जदके उम्मीदवार 16 जनवरी ने नाम पाछा ले सकेला। वोटों री गिणती 20 जनवरी ने करी जावेला।

राज्य मांय आज सरु करी ज्या सुशासन सप्ताह रा तैत प्रदेश मांय न्यारी—न्यारी ठोड़ां कार्यक्रम राख्यी ज्या। लोकसभा अध्यक्ष ओम बिरला वर्चुअल तरीका ऊं **कोटा** री जनता री परेशानियां सुणी अर अहलकारां ने ज़रूरी हुकम दीना। वे ग्राम विकास अधिकारी, आशा अर आंगनबाड़ी कार्यकर्तावां ने व्हाट्सएप ऊं जोड़ र जनसुणवाई रो प्रचार—प्रसार करण बाबत् कह्यो। **ब्यावर** ज़िला रा जवाजा मांय प्रशासन गांवों की ओर शिविर लगायी ज्यो। इण मांय ब्यावर रा एस.डी.एम. जल जीवन मिशन रा तैत नळ रा कनेक्शन करावण, जमीं रा पट्टा दिरावण, पाणी—बिजली री पूर्ति अर गेलां माथे गैर कानूनी कब्जा समेत जनता री न्यारी—न्यारी परेशानियां सुणी। **केकड़ी** मांय जिला कलेक्टर श्वेता चौहान जनसुणवाई रे दौरान गैर—कानूनी कब्जा, सड़क, पाणी, पेंशन अर जमीं रा झगड़ां ऊं जुड़्या 38 मामलां री सुणवाई कीनी। **भीलवाड़ा** ज़िला री सुवाणा पंचायत समिति मांय उपखंड स्तर री जनसुणवाई राख्यी ज्यी। ई दौरान एस.डी.ओ. जनता री समस्यावां सुण र अहलकारां ने ज़रूरी हुकम दीना। जयपुर, **चित्तौड़गढ़** अर **झालावाड़** मांय ई ज़िला कलेक्टर जनसुणवाई कीनी। **जैसलमेर** मांय जिला परिषद री मुख्य कार्यकारी अधिकारी सुनीता चौधरी जनसुणवाई कीनी। सुशासन सप्ताह 24 दिसंबर ताई चालेला।

चिकित्सा विभाग री ओर ऊं आज पूरा प्रदेश मांय वीडियो कॉल रे मार्फत स्वास्थ्य सेवावां री औचक जांच करी ज्यी। विभाग री प्रमुख शासन सचिव जिला स्तर रा अहलकारां सागे गांवां अर ढाणियां ताई रा स्वास्थ्य केंद्रां रा हालात री ठा करी ज्यी अर ज़रूरी हुकम दिया ज्या। प्रमुख शासन सचिव गायत्री राठौड़ बांसवाड़ा ज़िला रा आनंदपुरी, ब्यावर रा जवाजा, अलवर रा थानागाजी अर झालावाड़ समेत न्यारी—न्यारी ठोड़ां वीडियो कॉल कर र हालात रो जायजो लीनो। श्रीमती राठौड़ बीसीएमओ, चिकित्सा संस्थानां मांय लाग्योड़ा डॉक्टरां अर स्वास्थ्य ऊं जुड़्या दूजा कर्मचारियां सागे बातचीत कीनी अर ज़रूरी हुकम दीना।

राज्य मांय महिलावां अर टाबरियां री हिफाजत सारु पुलिस “राजकॉप सिटीजन एप” विकसित कीनो है। इण रा ज़िलेवार डेमो री सरुआत नुवा साल रा पहला सप्ताह मांय व्हेला। ई एप मांय महिलावां अर बच्चां री हिफाजत सारु ‘नीड हेल्प’ नाम रो सुबीतो जोड़ी ज्यो है। पेश है एक रपट —

000

अजमेर कने पुष्कर मांय ब्रह्मा जी रा मिंदर री हिफाजत ऊं जुड़्या इंतज़ामात रो आज एटीएस री टीम जायज़ो लीनो। एडिशनल एस.पी. नरेंद्र प्रताप सिंह री अगुवाई मांय हथियारबंद 20 कमांडो ब्रह्मा मंदिर रो दौरा कर र मंदिर प्रशासन रा अहलकारां ऊं ज़रूरी जाणकारी हासिल कीनी। टीम पुष्कर रा बाज़ार मांय मार्च ई कीनो।

000

राज्य सरकार श्रीगंगानगर मांय कैंसर अस्पताल खोलण सारु माली मंजूरी जारी कर दीनी है। प्रधान चिकित्सा अधिकारी डॉक्टर दीपक मोंगा बतायो के कैंसर अस्पताल मेडिकल कॉलेज परिसर मांय ई सरु कर्यो जावेला। ई सारु मेडिकल, रेडियेशन अर सर्जिकल ऑन्कोलॉजी रा 2—2 सहायक आचार्य अर रेडियोलॉजिकल अर मेडिकल फिजिक्स ऊं जुड़्या एक—एक ओहदा मंजूर करी ज्यो है। अस्पताल मांय लीनियर एक्सीलरेटर मशीन पीपीपी मोड माथे मुहैया करायी जावेला।

000

रेलवे कोटा कने सोगरिया अर बिहार रा दानापुर बीच ख़ास गाड़ी चलावण रो फैसलो कीनो है। आ गाड़ी 6 जनवरी 2025 ऊं सोगरिया ऊं हर सोमवार दोपहर पाछे पौने एक बज्यां रवाना व्हे र मंगलवार संवारे 10 बज्यां दानापुर पूगेला। दानापुर ऊं सात जनवरी ऊं हर मंगलवार दोपहरां पाछे पौने एक बज्यां रवाना व्हे र बुधवार संवारे 11 बज्यां सोगरिया पूगेला। आ गाड़ी सोगरिया ऊं 13 अर 27 जनवरी, 3, 10 अर 24 फरवरी ने अर दानापुर ऊं 14, 28 जनवरी, 04, 11, अर 25 फरवरी ने नी चालेला। आ गाड़ी बारां, रूठियाई, गुना, सागर, दमोह, कटनी मुडवारा, मैहर, सतना, मानिकपुर, प्रयागराज छिवकी, विंध्याचल, पं. दीन दयाल उपाध्याय नगर, बक्सर, आरा टेसनां माथे ई रुकेला।

000

मौसम विभाग राज्य मांय 25 दिसम्बर ऊं कठे—कठे बिरखा व्हेवण रा आसार जताया है। महकमा रे मुजब एक पश्चिमी विक्षोभ रा असर ऊं प्रदेश रा लंकाऊ—ऊगणी हलका मांय अर 26 अर 27 दिसम्बर ने उदयपुर, अजमेर, कोटा, जयपुर, भरतपुर अर बीकानेर संभाग रा कुछ हलकां मांय हल्की बिरखा व्हेवण रा आसार है। ई पाछे राज्य रा घणखर हलकां मांय सामान्य ऊं बत्ती बिरखा रा आसार है। ई दौरान अधिकतम तापमान सामान्य रेहवण री संभावना है। मौसम महकमो आवता 48 घंटां मांय कम—ती—कम तापमान मांय एक ऊं दो डिग्री सेल्सियस री और कमी रा आसार जताया है। ई पाछे न्यूनतम तापमान सामान्य ऊं 2 ऊं 3 डिग्री सेल्सियस कम रेहवण अर कठे—कठे शीत लहर चालण री संभावना है। ई बीचे आज प्रदेश मांय न्यूनतम तापमान मांय मामूली बधोतरी दर्ज करी ज्यी। राज्य मांय पड़ रही तेज़ ठारी ने ध्यान राखता थकां कृषि विभाग साखां ने पाला ऊं बचावण सारू एडवाइजरी जारी कीनी है। कोटपुतली—बहरोड़ जिला रा सहायक कृषि निदेशक रामजी लाल यादव पालो पड़बा री शंका व्हेवण परां साखां ने बचावण रा बारा मांय जाणकारी दीनी।